



UNIVERSITÄTS-
BIBLIOTHEK
PADERBORN

Universitätsbibliothek Paderborn

Epistolarvm Innocentii III. Romani Pontificis Libri Vndecim

Innozenz <III., Papst>

Parisiis, 1682

Salsbvirgensi Archiepiscopo.

urn:nbn:de:hbz:466:1-20006

ter te accingas ut Regem ipsum nobis, ut decet, opportuno tempore repræsentes; quatenus præmissis iis quæ solent & debent præmitti, nos eum in Romanum Imperatorem auctore Domino coronemus. Datum Laterani Nonis Aprilis.

TREVIRENSI ARCHIEPISCOPO.

Epist. 68.

Expectavimus hætenus expectantes si forsitan, beneplacito nostro per venerabilem fratrem nostrum Prænestinum Episcopum apostolicæ sedis Legatum plenius intellecto, carissimo in Christo filio nostro illustri Regi Ottoni in Romanorum Regem electo, maxime quia nobis ex generali debito & speciali juramento teneris, potenter & patenter adhærere jurates, & non fictè, sed verè potius præstares auxilium & favorem. Verùm, sicuti accepimus, mandatum nostrum implere dissimulas, & oblitus proprii juramenti, quod juraveras exequi vel differis nimium, vel omnino postponis. Monemus igitur fraternitatem tuam & exhortamur attentius & per apostolica tibi scripta mandamus, & sub debito fidelitatis quo Ecclesiæ Romanæ teneris astrictus, & vinculo juramenti quod super hoc specialiter præstitisti, districtè præcipimus quatinus eidem Regi de cetero fideliter & constanter adhærereas & potenter & patenter assistas. Alioqui noveris nos eidem Legato per apostolica scripta mandasse ut te tamquam transgressorem proprii juramenti singulis diebus dominicis & festivis, pulsatis campanis, & candelis accensis, excommunicatum publicè nuntiet, & mandet ab omnibus archiis evitari. Hoc idem etiam venerabilibus fratribus nostris Colonienfi, Maguntino, Bifuntino, Remensi quoque, ac Senonenfi Archiepiscopis districtè præcipiendo mandamus. Quod si nec sic forsitan mandatum curaveris apostolicum adimplere, securim poterit arbor sterilis non immeritò formidare. Si verò elegeris potius obedire, te tamquam venerabilem fratrem nostrum & honorabile apostolicæ sedis membrum honorare curabimus & taliter studebimus confovere quòd lædere te non poterunt jacula quæ formidas. Datum Laterani v. i. Idus Novembris, anno quinto.

*IOHANNI REGI ANGLORVM
illustri.*

Epist. 69.

Non debet aliis debitum denegare qui ab aliis quod sibi debetur postulat exhiberi. Quotiens autem tuæ serenitati scripserimus ut carissimo in Christo filio nostro illustri Regi Ottoni in Romanorum Imperatorem electo nepotito ea quæ inclitæ recordationis Richardus Rex Anglorum germanus tuus ei legaverat exhiberes, tua serenitas non ignorat. Quantum autem profecerimus per litteras super hoc totiens replicatas, facti evidentia manifestat. Sanè si quid tuo expediret honori debita meditatione pensare, non solum quæ ipsi ab alio sunt legata jamdudum ei sine diminutione qualibet solvere debuisses, sed efficax ei subsidium tam in personis quam rebus regaliter ministrare; cum credas, ut credimus, immo noris, ut novimus, aliquos contra eum, non in odium personæ, sed

sanguinis, graviter commoveri, non tam ipsum quam te in eo vel ipsum pro te lædere cupientes. Monemus igitur serenitatem regiam & exhortamur attentius quatenus nuntiis Regis ejusdem legatum ipsum cum integritate persolvas, & cum nos ei jam publicè favorem apostolicum impendamus, tu quoque in ejus auxilium potenter ac regaliter accingaris. Alioquin distractionem quam venerabilis frater Cantuariensis Archiepiscopus propter hoc duxerit exercendam, ratam haberi volumus, & præcipimus inviolabiliter observari. Datum Laterani v. Kal. Aprilis, anno quinto.

SALSBURGENSE ARCHIEPISCOPO.

Epist. 70.

Quantam venerabilis frater noster Pataviensis Episcopus inveniit gratiam in oculis nostris, cum in nostra esset præsentia constitutus, & quantum ei & Ecclesiæ suæ per auctoritatem sedis apostolicæ commodi provenerit & honoris, à sua tam citò non debuerat memoria excidisse. Sed cum eum inter alios Prælatos Ecclesiæ membrum firmissimum crederemus & ad exequenda mandata nostra promptum omnimodis invenire, dummodo ei constaret de nostræ beneplacito voluntatis, de ipso in contrarium sentire compellimur & aliud quam credidimus cogitare. Poterat quidem satis sufficere quòd ex quo sibi super imperij Romani negotio nostra innotuit intentio manifestè, non solum dispositioni nostræ acquiescere non curavit, verùm etiam modis omnibus in contrarium est enisus, sicut effectus operis manifestat. Sed ipse nobis mala pro bonis retribuens, non solum se voluntati nostræ opponere attentavit; quin etiam longè antè quædam sinistra de nobis, super quibus per litteras suas, quas apud nos in testimonium facimus reservari, convinci poterit in nostra præsentia constitutus, scribere non expavit. Præterea cum eidem Episcopo sæpe dederimus in mandatis ut carissimo in Christo filio nostro illustri Regi Vngariæ duo millia marcarum, quas eidem restituere procuraret, quibus pro Hierosolymitano itinere peragendo idem Rex plurimum indigebat, ipse id non solum efficere non procuravit, sed nec etiam super eo dignatus est nobis litteris vel nuntiis respondere, patenter ostendens se mandati apostolici contemptorem. Ad hæc, licet eidem fuerit ab apostolica sede præceptum ut pecuniam quam iniquè receperat pro redemptione inclitæ recordationis Richardi Regis Anglorum injustissimè capti de crucifixi servitio redeuntis, cujus captores, detentores, & fautores eorum Romana Ecclesia excommunicationis vinculo innodavit, restituere non differret, ipse tamen & animæ suæ salutem postponens, cui debuerat recepta taliter restituere per se ipsum, & apostolica mandata replicata sapius parvipendens, pecuniam ipsam restituere non curavit. Obventu in super litterarum falsarum, quas nullus sanæ mentis credere debuerat à nobis aliquatenus emanasse, prædictus Episcopus cum Frisingensi & Heisterensi Episcopis venerabilem fratrem nostrum Maguntinum Archiepiscopum in favorem adversariorum suorum ad suam præsentiam citare præ-

sumpsit, cum non deberet aliquatenus ignorare quod quae sunt iudicio sedis apostolicae terminata, supra quam non potest aliquis hominum iudicare, non consueverunt postmodum alieno iudicio retractari. Propter quod si vigeret in ipso illa discretio quae deberet, saltem de litteris illis debuerat dubitare quae contra iustitiam & formam sedis apostolicae sapere dinoscuntur, & a nobis inquirere si ei & aliis esset per illas litteras procedendum; sed ad exequenda iusta & honesta mandata nostra, sicut operis exhibitione clarescit, tepidum se exhibet & remissum; ea vero per quae possent aliquid in contemptum & detrimentum sedis apostolicae attentari, pro posse satagit celeriter & efficaciter adimplere. Vnde licet quidam de dictis excessibus sint adeo manifesti quod in praefatum Pataviensem Episcopum possemus de iure graviter vindicare, volentes tamen benignius secum agere, salva sententia si quam tulit in eum venerabilis frater noster Pranesstinus Episcopus apostolicae sedis Legatus, ut videamur rigorem mansuetudine temperare, eidem per scripta nostra districtè praecipiendo mandamus ut usque ad proximam Dominicam qua cantabitur *Latare Hierusalem* personaliter nostro se conspectui repraesentet, super praemissis omnibus & pluribus aliis plenariè responsurus. Alioquin ex tunc se noverit ab officio pontificali & sacerdotali suspensum. Ideoque fraternitati tuae per apostolica scripta mandamus & districtè praecipimus quatenus litteras nostras, quas eidem Patavienfi dirigimus, ipsi faciens per tuos nuntios praesentari, si forte ipse quod mandamus non curaverit adimplere, tu eum ab officio pontificali & sacerdotali suspensum per universam Salzeburgensem provinciam nunties, & facias ipsam suspensionis sententiam per distinctionem ecclesiasticam appellatione remota inviolabiliter observari. Qualiter autem in negotio ipso processerit, nobis non differas tuis litteris intimare. Datum Velletri v. i. Non. Octobr. pontificatus nostri anno quinto.

Scriptum est super hoc praedicto Patavienfi Episcopo.

EPISCOPO LINGONENSI.

Quantum venerabili fratri nostro Bisuntino Archiepiscopo gratiam impenderimus, cum olim in nostrae promotionis primordio ad sedem apostolicam accessisset, & qualiter ipsum in gratia & benedictione nostra, licet contra eum multa fuissent proposita, duxerimus ad suam Ecclesiam remittendum, si vir fidelis existeret, non potuisset tam celeriter oblivisci. Sed licet tam tempore felicitis recordationis Celsitini Papae praedecessoris nostri quam nostro proponerentur gravia & enormia, post suum tamen recessum a nobis deteriora de eo nostris auribus inculcantur, quae nec possumus nec debemus sub silentio praeterire. Praeterea cum ab Ecclesia Romana, cui tenetur iuramento fidelitatis astrictus, nulla debuerit ratione divertere vel ab ea quomodolibet dissentire, ipse, ex quo ei patenter innouit super negotio imperij nostrae beneplacitum voluntatis, non solum se ipsi opponere non expavit, verum etiam

nobilem virum Philippum Ducem Sueviae ad Burgundiam devastandam deduxit, & ipsum tamquam Regem catholicum processionaliter in Ecclesia recipiens Bisuntina, ei fecit a suis tamquam legitimo Regi honorem & reverentiam exhiberi. Nuntios insuper nostros & litteras in civitate ac terra sua capi permittit; & ipse, qui esse debuerat eorum defensor, factus est publicus inimicus. Cum igitur excessus huiusmodi nolimus relinquere impunitos, ne impunitas sua praesumptoribus transeat in exemplum, eidem Archiepiscopo per scripta nostra districtè praecipiendo mandamus ut usque ad proximam Dominicam qua cantabitur *Latare Hierusalem* per se vel responsales idoneos ad praesentiam nostram accedere non postponat, suam ostensurus, si poterit, innocentiam, vel nobis satisfactionem congruam impensurus. Alioquin ex tunc se noverit ab officio pontificali suspensum; salva sententia si quam tulit in eum venerabilis frater noster Pranesstinus Episcopus apostolicae sedis Legatus. Quocirca fraternitati tuae per apostolica scripta mandamus & districtè praecipimus quatenus nostras litteras, quas eidem Bisuntino dirigimus, per tuos eidem faciens nuntios praesentari, si forte ipse quae mandamus neglexerit adimplere, tu eum suspensum per universam Bisuntinam provinciam publicè nunties, & facias ipsam suspensionis sententiam per distinctionem ecclesiasticam appellatione remota inviolabiliter observari. Datum ut supra v. Non. Octobris.

Scriptum est super hoc praedicto Archiepiscopo iuxta praemissam formam.

Cum ab illis apostolicae sedis discrimen infertur qui eius esse debuerant defensores & se, si necesse foret, exponere periculis & tormentis, in amaritudinem inducimur vehementem, & ad vindictam non immeritò commovemur; ut pro impunitate unius non assumant audaciam praesumptores, & fideles in devotione fortius animentur. Audivimus eundem, & non potuimus non mirari, quod venerabilis frater noster Spirensis Episcopus mandatis apostolicis inobediens & rebellis existens, dispositionem nostram impeditè molitur, & nobis omnimodis se opponit; praeterea in duos decurforibus nostris manus per se ipsum iniiciens violentas, alterum eorum adhuc detinet carceralibus vinculis mancipatum, alium fecit ad suspendium in contemptum Ecclesiae Romanae deduci, qui quasi divino miraculo mortis dicitur periculum evitasse. Cum igitur haec non sint a nobis sub silentio transeunda, quae noscuntur in contemptum sedis apostolicae attentata, eidem Episcopo per scripta nostra districtè praecipiendo mandamus ut usque ad Dominicam qua cantabitur *Latare Hierusalem* proximè venturam per se vel responsales idoneos ad praesentiam nostram accedere non postponat, suam ostensurus, si poterit, innocentiam, vel &c. ut supra usque impensurus. Alioquin &c. in eundem ferè modum ut in illis qua mittuntur Lingonensi usque suspensum per universam provinciam Maguntinam &c. usque in finem. Datum ut supra.

Scriptum est super hoc Spirensi Episcopo.

Epist. 71.

Vide lib. 1. epist. 277. lib. 14. epist. 115. & lib. 16. epist. 63. 138.

Epist. 72.